
Senedd Cymru | Welsh Parliament

Y Pwyllgor Plant, Pobl Ifanc ac Addysg | Children, Young People and Education Committee

Gwasanaethau i blant sydd wedi bod mewn gofal: archwilio diwygio radical | Services for care experienced children: exploring radical reform

Ymateb gan Llywodraeth Cymru | Evidence from Welsh Government

Diben

Diben y papur hwn yw rhoi'r wybodaeth ddiweddaraf i'r Pwyllgor Plant, Pobl Ifanc ac Addysg am y gwaith sy'n cael ei wneud i gyflawni ymrwymiad Llywodraeth Cymru i drawsnewid gwasanaethau plant ledled Cymru.

Y Weledigaeth ar gyfer Gwasanaethau Plant yng Nghymru

Dyma ein gweledigaeth ar gyfer gwasanaethau plant yng Nghymru:

- Rydym am weld llai o blant a phobl ifanc yn ymuno â'r system ofal, drwy ddarparu'r cymorth cywir ar yr adeg gywir i deuluoedd sy'n wynebu cyfnodau anodd.
- I'r plant hynny sydd mewn gofal, rydym am iddynt aros yn agos i'w cartref er mwyn iddynt allu parhau i fod yn rhan o'u cymuned. Mae hyn yn golygu trefnu'r math cywir o ofal ar gyfer pob plentyn: diwygio ac uno gwasanaethau ar gyfer plant sy'n derbyn gofal a'r rhai sy'n gadael gofal, darparu cymorth arbenigol ychwanegol i blant ag anghenion cymhleth a chefnogi'r rhai sy'n gofalu am blant yn well. Rydym am i'r gwasanaethau hyn fod yn lleol, gael eu cynllunio'n lleol ac yn atebol yn lleol.
- Rydym am i'r bobl ifanc hynny sy'n gadael gofal deimlo eu bod yn cael eu cynorthwyo i ddechrau byw'n annibynnol pan fyddant yn barod ac i gynllunio ar gyfer eu dyfodol.

Mae ein Rhaglen Lywodraethu'n cynnwys 8 ymrwymiad, sydd, gyda'i gilydd, yn darparu'r fframwaith ar gyfer ein gweledigaeth i drawsnewid Gwasanaethau Plant yn sylfaenol. Bydd cyflawni'r ymrwymadau hyn yn ysgogi newid ar draws y system gyfan yng Nghymru gan gyd-fynd â'n [Cynllun Plant a Phobl Ifanc](#). Bydd y gwaith hwn yn ystyried Deddf Llesiant Cenedlaethau'r Dyfodol, er mwyn sicrhau ein bod yn gwella'r ddarpariaeth i bob Plentyn a Pherson Ifanc fel y gallant gyflawni eu potensial ni waeth beth fo'u cefndir na'u hamgylchiadau. Y bwriad yw cyhoeddi fersiwn ddiwygiedig o'r Strategaeth Tlodi Plant ddiwedd y flwyddyn. Mae llais a hawliau Plant a Phobl Ifanc wrth wraidd popeth a wnawn. Bydd yr ymrwymadau hyn a'r Cynllun yn cael eu cyflawni yn ystod tymor cyfan y Senedd hon.

Ymrwymiadau'r Rhaglen Lywodraethu ar gyfer Gwasanaethau Plant:

1. Edrych ar wneud diwygiadau radical i wasanaethau presennol ar gyfer plant sy'n derbyn gofal ac yn gadael gofal.
2. Cael gwared ar elw preifat o ofal plant sy'n derbyn gofal yn ystod tymor nesaf y Senedd.
3. Ariannu gwasanaethau preswyl rhanbarthol i blant ag anghenion cymhleth, gan sicrhau bod eu hanghenion yn cael eu diwallu mor agos at eu cartrefi â phosibl ac yng Nghymru lle bynnag y bo hynny'n ymarferol.
4. Cryfhau cyrff cyhoeddus yn eu rôl fel 'rhiant corfforaethol'.
5. Atal teuluoedd rhag chwalu drwy ariannu gwasanaethau eirioli i rieni y mae eu plant mewn perygl o ddod yn rhan o'r system ofal.
6. Darparu cymorth arbenigol ychwanegol i blant ag anghenion cymhleth a allai fod ar gyrion y system ofal.
7. Parhau i gefnogi a chynnal hawliau plant a phobl ifanc ar eu pennau eu hunain sy'n ceisio lloches.
8. Cefnogi ein cynllun Maethu Cymru cenedlaethol.

Cyflawni Rhaglen Drawsnewid

Rydym yn gwybod y bydd y newidiadau sydd eu hangen i wireddu ein Gweledigaeth ac 8 Ymrwymiad y Rhaglen Lywodraethu'n cymryd amser, ond gwyddom y gall pethau newid yn gyflym pan fydd pawb yn cydweithio. Gallwn, er enghraifft, ddysgu o enghreifftiau da o wasanaethau sydd eisoes yn cael eu darparu i blant a phobl ifanc sydd â phrofiad o ofal yng Nghymru ac adeiladu arnynt. Mae digwyddiad Dysgu ar y Cyd wedi'i gynllunio ar gyfer y Gwanwyn. Rydym wedi datblygu Rhaglen Drawsnewid bellach ac mae'r gwaith sy'n cael ei ddatblygu yn y Rhaglen hon wedi'i rannu dan dri phennawd – Llais Plant a Phobl Ifanc, cynorthwyo plant i aros gyda theuluoedd a darpariaeth seiliedig ar anghenion a gwerth. Dyma enghreifftiau allweddol o waith sy'n cael ei wneud o dan y tri phennawd hyn:

Llais Plant a Phobl Ifanc

Mae'n hollbwysig bod y weledigaeth hon yn cael ei llywio gan y rhai sydd â phrofiad o ddefnyddio'r gwasanaethau hyn. Dyna pam ar 3 Rhagfyr y llynedd, y cynhaliwyd Uwchgynhadledd Gyntaf Profiad Gofal gyda 50 o bobl ifanc naill ai mewn gofal ar hyn o bryd neu sydd newydd adael gofal ('Llysgenhadon Ifanc') a'r Prif Weinidog, y Gweinidog Cyfiawnder Cymdeithasol, Gweinidog y Gymraeg ac Addysg, y Dirprwy Weinidog Iechyd Meddwl a Llesiant a minnau. Pwrpas yr Uwchgynhadledd oedd i bobl ifanc gyfleu eu profiadau'n uniongyrchol i Weinidogion a rhannu eu syniadau ynghylch sut y gellir mynd ati ar y cyd i gyflawni ein nod o drawsnewid gwasanaethau plant mewn ffordd radical

Prif ganlyniad yr uwchgynhadledd fu datblygu Datganiad gyda phlant a phobl ifanc sydd â phrofiad o ofal; sicrhau bod eu lleisiau'n parhau wrth galon yr hyn a wnawn. Bydd y Datganiad yn cael ei gytuno'n ffurfiol rhwng y Llysgenhadon Ifanc, sy'n cynrychioli pobl ifanc sydd â phrofiad o ofal yng Nghymru, a Llywodraeth Cymru a bydd yn cael ei lofnodi gan Weinidogion Llywodraeth Cymru ym mis Mawrth.

Mae'r Datganiad yn cynnwys gweledigaeth o'r hyn y byddai trawsnewid gwasanaethau'n ei olygu i blant a phobl ifanc mewn gwirionedd. Bydd y weledigaeth yn cael ei datblygu ymhellach dros amser i adlewyrchu amgylchiadau sy'n newid. Mae ail ran y Datganiad yn cynnwys cyfres o ymrwymïadau a fydd yn helpu i wireddu'r weledigaeth ar y cyd.

Bydd yr ymrwymïadau hyn yn mynd i'r afael yn benodol â materion a amlygwyd gan bobl ifanc yn yr Uwchgynhadledd gan gynnwys yr angen am barhad a chysondeb cymorth a materion yn ymwneud â'r stigma o fod mewn gofal.

Rydym wedi ymrwymo i gynnal Uwchgynhadledd debyg ar ben-blwydd y Datganiad er mwyn adolygu cynnydd yn erbyn ei ymrwymïadau, a chyfres o ddigwyddiadau Ymarferwyr a Rhanbarthol yn ystod 2023.

Cryfhau cyrff cyhoeddus yn eu rôl fel 'rhiant corfforaethol'.

Un o ymrwymïadau ein Rhaglen Lywodraethu ar gyfer Gwasanaethau Plant yw 'Cryfhau cyrff cyhoeddus yn eu rôl fel 'rhiant corfforaethol'. Bydd cyflawni'r ymrwymïad hwn yn helpu i wella canlyniadau i blant sy'n derbyn gofal a'r rhai sy'n gadael gofal drwy helpu i ymgorffori ymdeimlad cryfach o weledigaeth a chyfrifoldeb tuag at y plant sy'n derbyn gofal a'r rhai sy'n gadael gofal fel blaenoriaeth i bawb sy'n ymwneud â'r plant a'r bobl ifanc hyn. Mae'r gwaith hwn yn allweddol i gyflawni'r datganiad o Uwchgynhadledd Gyntaf Gadael Gofal.

Prif elfennau'r gwaith hwn i'w cyflawni yw datblygu siarter rhianta corfforaethol eleni ochr yn ochr â chanllawiau statudol drafft rydym yn bwriadu eu cwblhau yn 2024. Bydd sefydliadau ac uwch arweinwyr sy'n ymrwymo i'r Siarter yn gwneud ymrwymïad cyhoeddus clir yn datgan eu cefnogaeth i bobl ifanc sydd â phrofiad o ofal a thrwy wneud hynny yn cael eu dwyn i gyfrif am sicrhau bod gwell cynnig o gymorth yn cael ei ddarparu i bobl ifanc sydd â phrofiad o ofal gan bob rhan o'r sector cyhoeddus.

Cynorthwyo plant i aros gyda theuluoedd

Fframwaith Ymarfer Cenedlaethol

Fel rhan o'n gwaith i drawsnewid gwasanaethau plant yng Nghymru rydym yn datblygu Fframwaith Ymarfer Cenedlaethol. Bydd y Fframwaith yn nodi sut rydym yn gweithio yng Nghymru mewn ffordd sy'n seiliedig ar gryfderau er mwyn sicrhau'r canlyniadau gorau i'n plant a'n pobl ifanc sydd fwyaf agored i niwed.

Bydd y Fframwaith Ymarfer Cenedlaethol yn gymysgedd o ofynion gorfodol ac awgrymiadau ymarfer, sydd wedi'u gwreiddio mewn ymarfer perthynol sy'n seiliedig ar gryfderau. Mae'n rhaid i'r agweddau allweddol ar ymarfer fod yn gyson ledled Cymru os yw pob plentyn a theulu'n mynd i dderbyn gwasanaeth tebyg ar drothwy cyffredin. Bydd hyn yn ein helpu i sicrhau mwy o gyffredinoedd a gweithio'n ddi-dor ar lefel leol, ranbarthol a chenedlaethol gan adeiladu ar y gwaith da hyd yma.

Bydd y Fframwaith Ymarfer Cenedlaethol yn ychwanegu gwerth i ymarfer lleol ac yn sicrhau y gellir cael cysondeb gan ganiatáu amrywiad lleol hanfodol o ran cyd-destun yr un pryd.

Mae Gofal Cymdeithasol Cymru wedi cynnal adolygiad o fframweithiau ymarfer eisoes, eu cryfderau a'u cyfyngiadau ac mae gwaith yn cael ei wneud bellach i ddatblygu'r Fframwaith Ymarfer Cenedlaethol mewn cydweithrediad â'r sector. Dechreuodd y gwaith ar hyn ddechrau Medi 2022 drwy gyd-gynhyrchu â rhanddeiliaid ac ymarferwyr allweddol a disgwylir y bydd y gwaith hwn yn cael ei gwblhau cyn diwedd 2023.

Cyn bo hir, byddwn yn cynnull Grŵp Arbenigol i gytuno ar gwmpas, fformat a chynnwys y Fframwaith ochr yn ochr â chynllun prosiect.

Eiriolaeth Rhieni

Rôl eiriolaeth rhieni yw cefnogi rhieni i ymwneud yn gadarnhaol â gweithwyr cymdeithasol, sefydliadau'r trydydd sector, y llysoedd teulu a gweithwyr proffesiynol eraill i ddatrys materion sy'n effeithio'n negyddol ar eu teulu. Yn aml, gall rhieni sydd â phrofiad o les plant weithio fel eiriolwyr i rieni eraill er mwyn rhoi cymorth i'w helpu gyda'u hymgysylltu a'u dealltwriaeth.

Rydym yn buddsoddi o leiaf £1.5 miliwn o gyllid dros y tair blynedd nesaf, drwy'r Gronfa Newid Plant Sydd â Phrofiad o Ofal. Bydd y cyllid hwn yn cael ei ddefnyddio i gynyddu prosiectau presennol yn ymwneud ag Eiriolaeth Rhieni yn rhanbarthol a sicrhau bod gwasanaethau newydd yn cael eu sefydlu ym mhob un o'r saith rhanbarth yng Nghymru fel rhan o ddarpariaeth genedlaethol.

Mae gwasanaethau eiriolaeth rhieni'n gweithredu ar raddfa gyfyngedig ar hyn o bryd mewn rhai ardaloedd, ac rydym yn cydweithio â darparwyr trydydd sector presennol (Gwasanaeth Eiriolaeth Ieuenctid Cenedlaethol (NYAS), TGP Cymru a'r Rhwydwaith Eiriolaeth Rhieni) i helpu i gynyddu eu gwasanaethau lleol yn rhanbarthol, cyn lledaenu i ardaloedd eraill o Gymru, fel rhan o'r gwaith o gyflwyno'r gwasanaeth yn genedlaethol.

Er mwyn helpu i ddarparu gwasanaethau'n gyson ar hyd a lled Cymru fel rhan o ddarpariaeth genedlaethol, rydym yn datblygu Fframwaith Cenedlaethol ar gyfer Eiriolaeth Rhieni gyda phartneriaid yn y trydydd sector. Mae hyn yn disgrifio meini prawf craidd y gwasanaeth y mae'n rhaid i bob rhanbarth eu cael ar waith, gan sicrhau bod gwasanaethau'n cael eu darparu'n gyson ledled Cymru

Rhaglen beilot Llys Teulu Cyffuriau ac Alcohol

Rydym wedi darparu £450,000 i gefnogi rhaglen beilot Llys Teulu Cyffuriau ac Alcohol dros gyfnod o ddwy flynedd. Mae'r Llys yn cynnig dull amgen i deuluoedd lle mae pryderon am gamddefnyddio sylweddau, drwy roi mynediad at driniaeth a chymorth dwys.

Cafodd y cynllun peilot ei lansio'n ffurfiol ar 25 Tachwedd 2021. Mae'r cynllun ar gael i deuluoedd sy'n cael eu cyfeirio gan awdurdodau lleol Caerdydd a Bro Morgannwg, ac yn gweithredu o Lys Teuluol Caerdydd. Nod y llys fydd torri'r cylch o blant yn mynd i mewn ac allan o'r system ofal a helpu rhieni i ddod yn rhydd o gamddefnyddio sylweddau fel y gellir eu hailuno'n ddiogel â'u plant ac atal plant rhag cael eu rhoi mewn gofal.

Bydd y cynllun peilot yn cael ei werthuso, a bydd y canfyddiadau'n cael eu defnyddio i lywio'r gwaith o gyflwyno Llysoedd Teulu Cyffuriau ac Alcohol yng Nghymru yn y dyfodol.

Darpariaeth seiliedig ar Anghenion a Gwerth

Dileu elw preifat o ofal plant sy'n derbyn gofal.

Mae dileu elw o ofal yn un o'r 46 maes polisi a amlygwyd yn y Cytundeb Cydweithio rhwng Llywodraeth Cymru a Phlaid Cymru.

Ein barn ni yw na ddylai fod yna farchnad ar gyfer gwasanaethau plant lle mae cwmnïau preifat yn gwneud unrhyw elw o'r plant y maen nhw'n gofalu amdanynt. Byddwn yn sicrhau nad yw'r dyletswyddau ar awdurdodau lleol sy'n ymwneud â phlant sy'n derbyn gofal, yn cael eu contractio i gwmnïau er elw ond yn parhau gydag awdurdodau lleol neu ddarparwyr sydd wedi newid i fodolau nid-er-elw, fel darparwyr trydydd sector neu'r rhai a sefydlwyd drwy'r mentrau cymdeithasol, cwmnïau cydweithredol a darpariaethau dan arweiniad y defnyddiwr sydd wedi'u cynnwys yn Neddf 2014.

Mae Gweinidogion wedi egluro mai cwmpas y gwaith yw tynnu elw o ofal plant sy'n derbyn gofal gyda ffocws cychwynnol ar blant mewn gofal preswyl a gofal maeth. Yn ddiweddarach, bydd gwaith yn canolbwyntio ar ofal cartref i blant ag anghenion cymhleth, ac ar ddarpariaeth llety â chymorth. Bydd gwaith polisi a deddfwriaethol yn cael ei strwythuro mewn modd sy'n cwmpasu pob elfen.

Yn ystod tymor y Senedd hon, byddwn yn rheoli'r newid hwn tuag at wasanaethau maeth a gofal preswyl nid-er-elw yng Nghymru. Un egwyddor allweddol yw na fydd arian cyhoeddus sy'n cael ei fuddsoddi mewn llety ar gyfer plant sydd â phrofiad o ofal yn cael ei gymryd fel elw, ond yn hytrach ei fod yn cael ei ail-fuddsoddi yn y gwasanaeth er mwyn sicrhau canlyniadau gwell i blant, gwella gwasanaethau a datblygu'r gweithlu.

Mae 'statws nid-er-elw', yn golygu math o berchnogaeth a rheolaeth lle bydd unrhyw arian dros ben a wnaed, ar ôl costau gweithredol a chostau eraill y cytunwyd arnynt, yn cael ei ail-fuddsoddi yn y gwasanaeth neu'n cael ei ddal fel cronfa wrth gefn at ddibenion elusennol. Does dim disgwyl i gostau gweithredol gynnwys unrhyw daliadau am reolaeth neu ffioedd eraill a dalwyd i drydydd partïon. Mae amrywiaeth o fodolau nid-er-elw ar gael yr ydym yn eu harchwilio gan gynnwys statws elusennol, mentrau cymdeithasol a chwmnïau cydweithredol. Mae swyddogion yn gweithio gyda phartneriaid i ddiffinio modelau addas, a fydd maes o law, yn cael eu nodi mewn deddfwriaeth. Y bwriad polisi yw na fydd darparwyr er elw yn gallu gweithredu yng Nghymru na darparu ar gyfer plant nad ydynt fel arfer yn byw yng Nghymru.

Cynhaliwyd ymgynghoriad cyhoeddus ffurfiol ar gynigion deddfwriaethol sylfaenol ar gyfer gofal cymdeithasol, dros ddeuddeg wythnos, rhwng 17 Awst a 7 Tachwedd 2022. Roedd yr ymgynghoriad hwn yn cynnwys sawl cwestiwn ar sut gallai deddfwriaeth sylfaenol gefnogi ein cynlluniau i ddileu elw.

O'r 200 ymateb a dderbyniwyd, roedd 153 yn ymwneud â'r cwestiynau ar ddileu elw. Mae'r rhain wedi cael eu dadansoddi a'u hystyried bellach. Mynegwyd amrywiaeth

eang o safbwyntiau – gan unigolion, ymarferwyr, darparwyr, y sector cyhoeddus/statudol, y sector annibynnol, y trydydd sector/y sector gwirfoddol a sefydliadau cynrychioliadol – mewn ymateb i'r cwestiynau a ofynnwyd. Bydd crynodeb o'r ymatebion yn cael ei gyhoeddi ym mis Mawrth 2023.

O ystyried maint y gwaith sydd ei angen i gyflawni'r ymrwymiad i ddileu elw preifat o ofal plant, sefydlwyd Bwrdd Rhaglen, dan gadeiryddiaeth Prif Swyddog Gofal Cymdeithasol Cymru. A key role of this Board is to ensure a safe transition, enabling local authorities to meet their statutory duties and avoid disruption to placements, build their resilience and enable existing for profit providers, who wish to do so, to adopt not for profit models of ownership. Mae aelodaeth y Bwrdd yn cynnwys darparwyr gofal maeth a gofal preswyl preifat, awdurdodau lleol, y Comisiynydd Plant, ac Arolygiaeth Gofal Cymru. Bydd y Bwrdd yn llywio'r broses o newid i ofal nid-er-elw mewn ffordd ofalus ac wedi'i rheoli. Bydd y tair blynedd nesaf yn canolbwyntio ar weithio gyda phlant sydd â phrofiad o ofal, awdurdodau lleol a phartneriaid i gynyddu darpariaeth gyhoeddus ac nid-er-elw er mwyn sicrhau bod sylfaen gref i bontio'n ddiogel i ofal nid-er-elw.

Mae cyllid o £68m (dros y tair blynedd nesaf) wedi'i roi i awdurdodau lleol i ehangu darpariaeth fewnol ac nid-er-elw

Ariannu gwasanaethau preswyl rhanbarthol i blant ag anghenion cymhleth, gan sicrhau bod eu hanghenion yn cael eu diwallu mor agos at eu cartrefi â phosibl ac yng Nghymru lle bynnag y bo hynny'n ymarferol.

Yn 2021-22, darparwyd cyllid o £4.8m i chwech o'r saith Bwrdd Partneriaeth Rhanbarthol (BPRh) o'r Gronfa Gofal Integredig i ddatblygu'r math hwn o ddarpariaeth. Mae cyllid yn cael ei gytuno ar hyn o bryd ar gyfer y BPRh sy'n weddill ym Mhowys, gyda disgwyl i'r ddarpariaeth fod yn ei lle tua diwedd 2023. Mae cyfanswm o 20 a mwy o welyau newydd wedi'u darparu. Yn ogystal, mae ein Cronfa Integreiddio Rhanbarthol newydd yn rhoi modd ariannol parhaus i ranbarthau er mwyn sicrhau bod y ddarpariaeth hon yn parhau.

Darparu cymorth arbenigol ychwanegol i blant ag anghenion cymhleth a allai fod ar gyrrion y system ofal.

Drwy'r Gronfa Integreiddio Rhanbarthol a thrwy Fyrddau Partneriaeth Rhanbarthol rydym wedi nodi 13 prosiect gwerth cyfanswm o £14m a dulliau newydd ledled Cymru sydd o fudd i blant ag anghenion cymhleth, fel anabledd ac anghenion emosiynol/ymddygiadol, a fydd yn galluogi plant i aros yng ngofal eu teuluoedd.

Rydym yn adolygu eu cynnydd ar hyn o bryd er mwyn sicrhau bod dysgu'n cael ei ledaenu. Mae comisiynu a chynllunio darpariaeth ar y cyd yn fwy helaeth yn hollbwysig, ochr yn ochr â llwybrau clir o ran cymhwysedd.

Cymorth Iechyd Meddwl

Rydym yn cydnabod y bydd ar blant a phobl ifanc sydd â phrofiad o ofal angen cymorth ar gyfer eu hiechyd meddwl ar adegau; cafodd hyn ei drafod fel rhan o'r Uwchgynhadledd ym mis Rhagfyr y llynedd. Rydym yn gweithio'n agos gyda chydweithwyr iechyd meddwl sy'n edrych ar wahanol fodolau gofal, ac mae hyn yn cynnwys cyfleoedd i rannu arferion gorau mewn meysydd megis llety addas diogel. Mae Iechyd Meddwl, Gwasanaethau Plant a phartneriaid eraill (e.e. yr Heddlu a Gwasanaethau Cyfiawnder Ieuencid) yn cydweithio'n agos er mwyn gwella canlyniadau i'r holl bobl ifanc ag anghenion cymhleth nad ydynt yn cyrraedd y trothwyon i allu elwa ar Wasanaethau Iechyd Meddwl Arbenigol i Blant a'r Glasoed (sCAMHS) ond sydd angen ymateb amlasiantaethol.

Mae nifer o enghreifftiau o arferion gorau yn digwydd yng Nghymru eisoes i fynd i'r afael â'r heriau hyn. Er enghraifft: cynigion llety diogel a ariennir drwy weithredu rhanbarthol, a fydd yn darparu gwelyau tymor hwy ar gyfer y plant a'r bobl ifanc hynny a fydd yn elwa o gymorth iechyd a gofal cymdeithasol amlddisgyblaeth i ddiwallu eu hanghenion; Windmill Farm sy'n darparu llety tymor canolig nes bod y llety diogel mwy hirdymor ar waith - dyma fodel y gellid ei efelychu o bosibl ledled Cymru; a chyflwyno'r fframwaith NYTH. Rydym hefyd yn cyflwyno nifer o brosiectau peilot ledled Cymru sy'n darparu darpariaeth 'noddfa' a chefnogaeth amlddisgyblaethol i blant a phobl ifanc sydd mewn argyfwng.

Cynorthwyo Maethu Cymru i gynyddu nifer ac amrywiaeth gofalwyr maeth.

Sefydlwyd Maethu Cymru fel rhwydwaith cenedlaethol cydweithredol o holl dimau maethu nid-er-elw Awdurdodau Lleol yng Nghymru. Mae Maethu Cymru'n gweithio fel tîm gyda gofalwyr maeth i adeiladu gwell dyfodol i blant lleol drwy eu helpu i aros yn eu hardal leol pan fydd hynny'n iawn iddynt hwy. Mae Maethu Cymru wedi cynnal ymgyrchoedd marchnata uchel eu proffil ac rydym yn parhau i gefnogi seilwaith Maethu Cymru drwy drefniadau cyllido blynyddol.

Cysoni ffioedd a lwfansau ar gyfer gofalwyr maeth

Un elfen allweddol o raglen waith Maethu Cymru yw darparu cynnig cyson o gymorth i bob gofalwr maeth a elwir yn "Ymrwymiad Cenedlaethol". Mae hyn yn cynnwys cymorth ariannol. Yng Nghymru, mae pob un o'r 22 awdurdod lleol yn darparu lefelau gwahanol o daliadau i'w gofalwyr maeth ar hyn o bryd. Felly mae gweithio i gysoni'r ffioedd a'r lwfansau a roddir i ofalwyr maeth yn flaenoriaeth.

Y Lwfans Gofynnol Cenedlaethol (LGC) yw'r lwfans craidd sylfaenol y mae gofalwyr maeth yn ei gael i dalu'r costau sy'n gysylltiedig â gofalu am unrhyw blentyn maeth. Y bwriad yw gosod meincnod ar gyfer cyfraddau talu i bob gofalwr maeth. Mae'r lwfans yn sicrhau y gellir cwrdd yn ddigonol â chostau sylfaenol gofalu am blentyn sy'n derbyn gofal. Bydd yr union lefel y bydd unrhyw ofalwr maeth yn ei derbyn yn dibynnu ar sawl ffactor, yn enwedig anghenion penodol y plentyn unigol.

Yn 2020, comisiynodd Llywodraeth Cymru adolygiad cynhwysfawr o'r LGC fel rhan o'r gwaith ehangach sy'n cael ei wneud ar gysoni. Y bwriad yw y bydd canlyniad yr adolygiad hwn yn gosod meincnod ar gyfer cyfraddau taliadau yn y dyfodol i bob gofalwr maeth. Roedd yr adolygiad yn cynnwys edrych ar y costau gwirioneddol sy'n

gysylltiedig â gofalu am blentyn, a'r effaith ar allu teulu maeth i ennill arian neu ddiwallu anghenion pob plentyn yn y tŷ.

Bydd newid lefelau a strwythur yr LGC yn effeithio ar y sector, felly mae angen ystyried unrhyw newidiadau arfaethedig yn ofalus, eu heffaith, sut byddant yn cael eu gweithredu ac yn bwysicaf oll, sut mae'r newidiadau'n cyd-fynd â'r amserlenni sy'n gysylltiedig â'r gwaith ehangach ar gysoni'r holl daliadau ar gyfer gofalwyr maeth.

Ar hyn o bryd mae Maethu Cymru'n gwneud darn penodol o waith modelu i helpu Llywodraeth Cymru i wneud penderfyniad ynghylch strwythur a lefelau talu newydd ar gyfer y LGC. Mae'n datblygu'r modelu ariannol ar gyfer y lwfansau (ffioedd) ychwanegol fel y gellir cyfrifo costau symud o'r trefniadau talu presennol i gyfres newydd o drefniadau cyson.

Gorchymynion Gwarcheidiaeth Arbennig

Mae gorchymyn gwarcheidiaeth arbennig yn orchymyn llys sy'n penodi person neu bersonau i fod yn warcheidwad arbennig i blentyn. Mae'n rhoi cyfrifoldeb rhiant i'r gwarcheidwad arbennig am bron bob penderfyniad sy'n effeithio ar y plentyn ac yn cyfyngu ar hawliau rhieni geni i ymyrryd neu herio'r gorchymyn heb fynd i'r llys. Mae gwarcheidiaeth arbennig yn rhoi statws cyfreithiol sy'n cynnig mwy o ddiogelwch na maethu tymor hir, ond heb y toriad cyfreithiol llwyr gyda theulu biolegol y plentyn sy'n gysylltiedig â mabwysiadu.

Mae'r angen i leihau nifer y plant sy'n dechrau derbyn gofal ac sy'n parhau i dderbyn gofal yn ddiangen yng Nghymru yn gorfodi Llywodraeth Cymru i edrych ar sut gall gwarcheidiaeth arbennig ddod yn ganlyniad mwy diogel sy'n cael ei gefnogi i raddau mwy i blant a'u teuluoedd, gan wneud y gorchymyn yn opsiwn y gellir ei ystyried yn briodol mewn ymarfer gwerthuso lles.

Mae darparu gwasanaethau cymorth ar gyfer gwarcheidiaeth arbennig yn amrywio ar hyd a lled y wlad. Mae rhai awdurdodau lleol yn darparu pecyn cymorth llawn, gan gynnwys cymorth gan gymheiriaid, mynediad at wasanaethau therapiwtig a dull dychmygus o helpu plant i gadw mewn cysylltiad neu dreulio amser gydag aelodau o'r teulu (cyswllt). Dim ond megis dechrau'r broses o greu system fwy pwrpasol o gefnogaeth i deuluoedd gwarcheidiaeth arbennig y mae awdurdodau lleol eraill. Mae'r system newydd hon yn wahanol i'r dull arferol o fynediad 'drws ffrynt' adran gwasanaethau cymdeithasol yr awdurdod lleol, ac mae ar gael i bob teulu cymwys drwy Ddeddf Gwasanaethau Cymdeithasol a Llesiant (Cymru) 2014.

Ym mis Mawrth 2020, lansiodd Llywodraeth Cymru fframwaith o gefnogaeth i Warcheidwaid Arbennig sy'n cyflwyno 'cynnig' Cymru gyfan o wasanaethau cymorth ar gyfer gwarcheidiaeth arbennig. Mae'n amlinellu'r isafswm a ddylai fod ar gael gan bob awdurdod lleol i gefnogi Gwarcheidwaid Arbennig er mwyn cydymffurfio â'r fframwaith rheoleiddio.

Yn ystod 2021-22, cynhaliodd Llywodraeth Cymru adolygiad i sefydlu sut mae awdurdodau lleol wedi ymwreiddio'r canllaw ac i weld a oedd unrhyw awgrymiadau pellach ynghylch sut y gellir rhoi'r canllaw ar waith er mwyn sicrhau bod cynnig cyson o gymorth yn cael ei ddarparu i Warcheidwaid Arbennig ledled Cymru. Dangosodd yr

adolygiad fod angen gwneud rhagor o waith er mwyn sicrhau bod Gwarcheidwaid Arbennig yn cael eu cefnogi'n llawn yn ariannol ac yn ymarferol, fel y gallant ddarparu ar gyfer y plant maen nhw'n gofalu amdanynt.

Mae Grŵp Arbenigol yn cael ei sefydlu ar hyn o bryd i ystyried yr argymhellion sy'n deillio o'r adroddiad ac i lunio rhaglen waith er mwyn mynd i'r afael â'r meysydd allweddol o bryder, gan sicrhau bod cynnig cyson o ofal a chefnogaeth i Warcheidwaid Arbennig sy'n cynnwys cymorth ariannol fel bod teuluoedd yn derbyn gofal priodol ac yn gallu aros gyda'i gilydd.

Model Ysgolion Rhithwir

Nod dull yr Ysgol Rithwir yw gweithio gyda phlant sy'n derbyn gofal (ac, mewn rhai achosion, pobl ifanc mewn darpariaeth ôl-16) ar draws awdurdod lleol fel pe baent mewn ysgol unigol, i godi cyrhaeddiad addysgol, gwella presenoldeb a gwella sefydlogrwydd addysgol. Mae Ysgol Rithwir yn offeryn sefydliadol sydd wedi'i greu i gydlynu cefnogaeth yn effeithiol i'r grŵp hwn ar lefel strategol a gweithredol.

Ar hyn o bryd, mae Llywodraeth Cymru'n ariannu cynllun peilot tair blynedd o'r Model Ysgolion Rhithwir ar hyd a lled Cymru, rhwng 2021-2024. Mae awdurdodau lleol wedi cael eu gwahodd i wneud cais am gyllid o hyd at £100,000 fesul awdurdod lleol, wedi ei rannu dros gyfnod o ddwy flynedd, i weithredu'r dull integredig hwn o wella canlyniadau addysgol i blant sy'n derbyn gofal (a phlant a oedd yn derbyn gofal yn flaenorol).

Dros y flwyddyn nesaf, cynhelir gwerthusiad o'r Model Ysgolion Rhithwir, gan edrych ar y broses o roi'r cynllun peilot ar waith, effaith y cynllun a'i werth am arian.

Cynllun Peilot Incwm Sylfaenol ar gyfer Pobl Ifanc sy'n Gadael Gofal yng Nghymru

Ar 28 Mehefin 2022, lanswyd cynllun peilot Incwm Sylfaenol Llywodraeth Cymru yn ffurfiol ar gyfer pobl sy'n gadael gofal yng Nghymru. O 1 Gorffennaf 2022 ymlaen, bydd mwy na 500 o bobl sy'n gadael gofal yng Nghymru, sy'n cyrraedd eu pen-blwydd yn 18 oed rhwng 1 Gorffennaf 2022 a 30 Mehefin 2023, yn cael cynnig £1,600 bob mis (cyn treth) am ddwy flynedd i'w cynorthwyo wrth iddynt bontio i fywyd oedolyn. Ar ôl treth, y swm y bydd pob derbynnydd yn ei gael bob mis yw £1,280. Gall y rhai sy'n gadael gofal sy'n cymryd rhan yn y cynllun peilot gael cyngor a chymorth ariannol hefyd er mwyn sicrhau eu bod yn cael eu cynorthwyo i wneud penderfyniadau gwybodus am y cynllun, eu cyllid a'u dyfodol.

Ar hyn o bryd mae 98% wedi ymuno â'r cynllun peilot (yn seiliedig ar amcangyfrifon o'r rhai sy'n gymwys gan awdurdodau lleol).

Fe wnaeth Llywodraeth Cymru gynnwys y rhai sy'n gadael gofal yn uniongyrchol wrth ddatblygu'r peilot, yn ogystal â gweithio gyda gweithwyr proffesiynol mewn awdurdodau lleol a sefydlu Grŵp Cynghori Technegol hefyd, dan gadeiryddiaeth yr Athro Syr Michael Marmot, gan ddwyn ynghyd arbenigwyr ym meysydd incwm sylfaenol a chymorth i bobl sy'n gadael gofal i lywio'r gwaith o ddatblygu a gwerthuso'r cynllun peilot.

Prif werthuswr y cynllun peilot yw Prifysgol Caerdydd dan arweiniad Canolfan Ymchwil a Datblygu Gofal Cymdeithasol Plant (CASCADE) y Brifysgol. Mae gan y

tîm gwerthuso arbenigedd ym maes gadael gofal, tlodi a lles, digartrefedd, iechyd, epidemioleg, incwm sylfaenol, gwerthuso economaidd, cysylltu data, econometreg a methodolegau ansoddol creadigol. Bydd y gwerthusiad yn edrych ar ddull gweithredu'r cynllun peilot, effaith y cynllun a'i werth am arian. Mae gwaith cyfranogol a chyd-greu gyda phobl ifanc a'r cyfranogwyr yn ganolog i gynllun y gwerthusiad.

Bydd yr hyn a ddysgir o'r cynllun peilot, adolygiad clir a chyfres o argymhellion yn cael eu paratoi. Bydd hyn yn caniatáu i wersi gael eu dysgu, a fydd o fudd i'r rhai sy'n gadael gofal a phoblogaeth ehangach Cymru.

Diwygio Cyfiawnder Teuluol

Mae llawer o'r materion sy'n ymwneud â chyfiawnder teuluol yn berthnasol yn uniongyrchol i'n hagenda trawsnewid Gwasanaethau Plant, er enghraifft achosion lle mae awdurdod lleol yn ymyrryd i amddiffyn plant sydd wedi neu yr amheuir eu bod wedi dioddef niwed neu gamdriniaeth sylweddol.

Felly mae Llywodraeth Cymru'n cydweithio ag Adrannau Llywodraeth y DU ac asiantaethau Llywodraeth y DU er mwyn helpu i sicrhau bod polisïau'n cael eu datblygu a'u cyflawni'n briodol yng Nghymru gan ystyried cyd-destun Cymru. Mae cynllun peilot y Llysoedd Teulu Cyffuriau ac Alcohol yn enghraifft o weithio'n effeithiol gyda Lloegr.

Mae enghreifftiau eraill yn cynnwys cynrychiolaeth o Gymru ar y Gweithgor Cyfraith Gyhoeddus (PLWG). Ffurfiwyd PLWG, cyn pandemig COVID-19, i ymchwilio i'r cynnydd sylweddol mewn achosion cyfraith gyhoeddus sy'n dod i'r Llys Teulu ac i gynnig argymhellion ar gyfer gwella gallu'r system i fynd i'r afael ag anghenion y plant a'r teuluoedd yng nghanol yr achosion pwysig hyn.

Mae gwaith y Rhwydwaith Cyfiawnder Teuluol yng Nghymru, drwy ganolbwyntio ar y posibilrwydd o ddargyfeirio plant a phobl ifanc yn ddiogel oddi wrth fod yn destun achosion cyfraith gyhoeddus (ac felly dileu'r posibilrwydd y cânt eu rhoi mewn gofal), a bod prydlondeb penderfyniadau, unwaith y byddant yn destun achosion, yn cyd-fynd ag amcanion PLWG.

O ran cyfraith breifat, sefydlwyd y Gweithgor Cyfraith Breifat i gynghori'r Bwrdd Cyfiawnder Teuluol ar gynigion ar gyfer diwygio cyfraith breifat yn sylweddol, ac mae Cymru'n ymwneud â hyn drwy'r Rhwydwaith Cyfiawnder Teuluol yng Nghymru. Prif nod y Gweithgor oedd hyrwyddo dulliau anwrthwynebus /datrys problemau. Fel rhan o'r cynllun hwn, mae ardal Cyfiawnder Teuluol Gogledd Cymru yn un o ddau safle braenaru (ochr yn ochr â Dorset) i brofi a gwerthuso Rhaglen Trefniadau Plant ddiwygiedig.

Pwrpas y cynllun peilot Braenaru (Llys Cam-drin Domestig Integredig (IDAC)) yw profi buddion ymyrraeth yn llawer cynt yn y cylch cyfreithiol, rhoi plant yng nghanol y broses, blaenoriaethu dull diogelwch yn gyntaf gan gynnwys goroeswyr cam-drin domestig, a dargyfeirio teuluoedd oddi wrth y llys lle y bo hynny'n bosibl, gan gydnabod yr un pryd y bydd rhai teuluoedd angen ymwneud pellach â'r llys teulu.

Rhaglen Trawsnewid - Llywodraethu

Er mwyn cyflwyno rhaglen mor hanfodol, mae angen i ni roi'r lefel gywir o lywodraethu ar waith. Rydym wedi cymryd agwedd tair haen o ddarparu'r cyfeiriad a'r dull craffu cywir i gyflawni ein nodau. Mae gan y strwythur dri grŵp allweddol:

- i. **Bwrdd Goruchwylio Gweinidogol** i oruchwylio'r Rhaglen Trawsnewid, gan ddarparu arweinyddiaeth wleidyddol a chyfeiriad i'w gadeirio gan y Prif Weinidog a minnau
- ii. **Grŵp Cyflawni Trawsnewid** i arwain y gwaith o fwrw ymlaen â'r Rhaglen Trawsnewid erbyn 2026. Jonathan Griffiths, Cyfarwyddwr Trawsnewid Plant ac Oedolion, sy'n cadeirio'r Grŵp hwn.
- iii. Bydd **Bwrdd y Rhaglen Dileu Elw o Ofal Plant sy'n Derbynn Gofal** yn parhau i ddarparu arbenigedd ychwanegol wrth i ni ystyried tystiolaeth, deddfu a datblygu rhaglenni ymarferol ar gyfer gweithredu'r ymrwymiad hwn.

Sefydlu Tîm Cenedlaethol

Mae Jonathan Griffiths, a fu gynt yn Llywydd ADSSC a Chyfarwyddwr Gwasanaethau Cymdeithasol yn Sir Benfro, wedi'i benodi'n Gyfarwyddwr Trawsnewid Plant ac Oedolion. Ochr yn ochr â Jonathan, bydd Anthony Douglas, cyn brif weithredwr CAF/CASS Lloegr, fel arweinydd Gweithredu Trawsnewid Plant, yn bwrw ymlaen â'r gwaith o weithredu ymarfer sy'n seiliedig ar gryfderau gan weithio ochr yn ochr ag awdurdodau lleol a phartneriaid allweddol yn enwedig iechyd, gan ddarparu gallu ychwanegol i sicrhau newidiadau allweddol a chysondeb mewn ymarfer.

Buddsoddiad

Rydym yn deall bod angen buddsoddi er mwyn datblygu'r Rhaglen hon o newid ac ymateb i'r her o niferoedd cynyddol o blant yn derbyn gofal.

Mae gennym gyllideb refeniw o £68m dros y tair blynedd nesaf (£46m ar gyfer yr ymrwymiad Dileu a £22m ar gyfer ein hymrwymiad Diwygio Radical). Mae cyllid cyfalaf ar gael gan y Gronfa Gyfalaf Integreiddio ac Ailgydbwysu (IRCF) hefyd. Mae £35m ar gael yn 23/24 a £60m yn 24/25 i gefnogi'r agenda dileu elw yn uniongyrchol ochr yn ochr â datblygu hybiau iechyd a gofal cymdeithasol integredig ac ailgydbwysu'r farchnad gofal preswyl i oedolion

Gweler isod enghreifftiau o'r cyllid gwasanaethau cymdeithasol y cytunwyd arno er mwyn bwrw ymlaen â'n gwaith yn y maes hwn.

Dileu Elw	£46m dros dair blynedd 2022/23 – 2024/25 Cyfalaf – mynediad at £35m yn 23/24 a £60m yn 24/25 gan yr IRCF.
Diwygio Radical	£22m dros dair blynedd 2022/23 – 2024/25
Eiriolaeth Rhieni	£1.5m dros dair blynedd 2023/24 – 2025/26

Cymorth ar gyfer Maethu Cymru	£0.5m cyllid craidd rheolaidd. Mae cyllid ychwanegol yn cael ei ystyried ar hyn o bryd ar gyfer tair blynedd 2022/23-2024/25
Siarter Rhianta Corfforaethol	£15,000 y flwyddyn – 2022/23 – 2024/25
Plant ag Anghenion Cymhleth	£14m dros dair blynedd drwy'r Gronfa Integreiddio Rhanbarthol

Gweithlu

Bydd bwrw ymlaen ag unrhyw ran o'r gwaith hwn yn her heb gymorth ychwanegol i'r gweithlu gofal cymdeithasol ac yn enwedig gweithwyr cymdeithasol. Y llynedd, cyhoeddodd Gofal Cymdeithasol Cymru Gynllun Gweithlu ar gyfer Gwaith Cymdeithasol: 2022 i 2025. Mae'r cynllun gweithlu'n mynd i'r afael â materion fel denu a recriwtio, addysg a dysgu, arweinyddiaeth a lles, ac yn adlewyrchu gwaith sy'n digwydd eisoes, fel pwysigrwydd edrych ar delerau ac amodau a'r newidiadau sy'n cael eu gwneud i'r fframwaith ôl-gymwysterau.

Gyda chymorth cyllid gan Ofal Cymdeithasol Cymru, mae ADSS Cymru'n arwain y gwaith o adolygu costau gweithwyr asiantaeth mewn gwasanaethau plant, gan ddwyn syniadau ynghyd ynghylch gwaith asiantaeth mewn cyfres o argymhellion i awdurdodau lleol eu hystyried, ac sy'n gysylltiedig â memorandwm cydweithredu.

Yn ogystal, mae Llywodraeth Cymru wedi cynyddu'r fwrariaeth gwaith cymdeithasol yn ddiweddar hefyd, er mwyn annog mwy o bobl i hyfforddi fel gweithwyr cymdeithasol. Mae'r fwrariaeth gwaith cymdeithasol yn cyfateb i becyn gwerth bron i £10 miliwn mewn cymorth ariannol i fyfyrwyr gwaith cymdeithasol dros dair blynedd. Roedd y fwrariaeth uwch ar gael i fyfyrwyr newydd a myfyrwyr presennol o fis Medi 2022 ymlaen a chynyddodd y fwrariaeth israddedig £1,250 (+50%), a'r fwrariaeth ôl-raddedig £6,075 (+91%).

Rydym yn parhau i ddarparu cronfeydd sylweddol, dros £7.1m, i'r sector ar gyfer hyfforddiant a datblygiad, drwy Raglen Datblygu Gweithlu Gofal Cymdeithasol Cymru, a reolir gan Gofal Cymdeithasol Cymru.

Hefyd, mae Gofalwn Cymru, ymgyrch denu a recriwtio genedlaethol ar gyfer gofal cymdeithasol, wedi tynnu sylw at rôl gweithwyr cymdeithasol drwy rannu straeon ysbrydoledig go iawn ar ei wefan a'i sianeli cyfryngau cymdeithasol gyda'r nod o ddenu mwy o bobl i'r proffesiwn.

Y Ffordd Ymlaen ar gyfer Trawsnewid – amserlenni

Ynghlwm yn Atodiad A mae dogfen y Ffordd Ymlaen, sy'n nodi'r amserlenni disgwyliedig cyfredol ar gyfer ein cynnydd gydag ymrwymadau Gwasanaethau Plant ein Rhaglen Lywodraethu a'r gwaith o'u cyflawni.

Cerrig Milltir ein Rhaglen Drawsnewid

2023

2024

2025

2026

Cefnogi plant i aros gyda theuluoedd

Fframwaith Ymarfer Cenedlaethol newydd Sefydlu grŵp arbenigol (Chwef 2023) Cydgynhyrchu cynnwys ⚙️ Drafft cyntaf y Fframwaith (Haf 2023) Ymgynghori (Haf 2023) Hyfforddiant, Ymwybyddiaeth a Chyflwyno (Diwedd 2023)

Eiriolaeth rhieni Cymeradwyo'r Fframwaith Eiriolaeth Rhieni Dechrau ei gyflwyno'n genedlaethol – Ebrill 2023

Llysoedd Teulu Cyffuriau ac Alcohol (FDAC) Parhau i gefnogi cynllun peilot FDAC Cefnogi cam olaf gwerthusiad cynllun peilot FDAC ⚙️ Ystyried ei gyflwyno'n genedlaethol (gwanwyn 2024)

Cefnogi cydweithio amlasiantaethol Gweithdy amlasiantaethol - dysgu ar y cyd (gwanwyn 2023)

Darpariaeth ar sail anghenion a gwerthoedd

Cyflwyno'r Model Ysgolion Rhithwir Digwyddiad dysgu ar y cyd (hydref 2023) Gwerthuso'r cynllun peilot Ysgolion Rhithwir

Gorchmynion Gwarcheidiaeth Arbennig Cwblhau'r arolwg (Rhagfyr 2022) Sefydlu grŵp arbenigol (gwanwyn 2023) Dadansoddi argymhellion yr arolwg (Cwblhau erbyn diwedd 2023) Datblygu cynllun gweithredu

Datblygu Maethu Cymru Adolygiad o'r Fframwaith Dysgu a Datb. (Ion 2023) Lwfans uwch a lansio cynllun cened. cyfeirio ffrind (gwanwyn 2023) Cynnig Craidd/Ymrwymiad Cenedlaethol (haf 2023) Datblygu pecyn adnodd (o Awst 2023) O bosib, cyflwyno harmoneiddio ffioedd (gwanwyn 2024) Swyddog recriwto penodol i bob ALI (erbyn gwanwyn 2024)

Dileu elw o ofal plant sy'n derbyn gofal Cyhoeddi crynodeb o'r ymatebion i'r ymgynghoriad cyhoeddus a rhoi cyngor i'r Gweinidog (gwanwyn 2023) Gweithio ar gynllun gweithredu a deddfwriaeth (gwanwyn 2023) Cyfarfodydd I drafod Strategaethau Comisiynu Lleoliadau yr ALIau (2023) ⚙️ Dechreuwyd newydd– Nid-er-elw yn unig (Ebrill 2026)

Llais plant a phobl ifanc

Uwchgynadledd profiad o ofal ⚙️ Uwchgynhadledd gyntaf (Rhag 2022) Llofnodi datganiad yr uwchgynhadledd a dechrau gwaith i gefnogi gweithredu ⚙️ Ail uwchgynhadledd (Rhagfyr 2023)

Rhianta corfforaethol ⚙️ Lansio'r siarter a'i llofnodi ar draws y sector (gwanwyn 2023) ⚙️ Canllawiau statudol cryfach yn dod i rym (gwanwyn 2024)

Gweithio gydag ymarferwyr Digwyddiad i ymarferwyr i rannu arferion gorau (haf 2023)